


► *Marinus Wegereef di Comision 4 di Mei*

Museo dedicá na Schutterij nunca por ta un ofensa pa ningun hende *sigur no p'esnan cu a sirbi nos país*



ORANJESTAD - Ta di lamentá profundamente, e forma con un iniciativa asina emotivo y importante, ta ser menospreciá y masacrá, pa kizas diferencia di opinion riba kico mester ser haci of kico no mester a ser haci. Na palabra Marinus Wegereef, miembro di Comision 4 di Mei.

Na promé instante tur programa di bishita di cualkier miembro di Cas Real Hulandes, ta ser sometí na un riguroso control di parti di e departamento encarga cu e

bishita, pa di e forma aki haña aprobacion p'e actividad cu e miembro di Cas Real tin cu atendé.

Esaki tabata e caso tambe cu Su Alteza Real Principe Willem Alexander siman pasá y su bishita n'e museo dedicá na miembronan di Schutterij y di e Burgerwacht, kendenan a sirbi nan país durante di Dos Guerra Mundial, tabatin tur aprobacion necesario.

Loke e Arubianonan aki a haci den e periodo difícil aki pa mundo henter, hamas y nunca

por ser falsificá y ta di lamentá cu ta presentá scenarionan cu no ta cuadra cu realidad, causando daño n'esnan cu si ta sostené y ta sumamente contento cu e proyecto di museo, segun Marinus Wegereef.

For di promé instante a ser mostrá cu e sitio caminda e pone e museo n'e momentonan aki, net dilanti di Aeropuerto Internacional Reina Beatrix, ta un bunker cu a ser construí den añanan '50, mustrando bon cla cu esaki no tin algo di haber cu

di Dos Guerra Mundial.

E avion Dakota ta un ehemplar igual na loke a ser usá den di Dos Guerra Mundial y ningun momento a bisa cu ta trata di un avion autentico di e periodo aki, pero el a ser usá pa haci mas yamativo e monumento loke ta e caso n'e momentonan aki tambe, segun e miembro di Comision Conmemorativo 4 di Mei.

N'e museo a pone un placa conmemorativo na honor di esnan cu a sirbi den Schutterij y den Burgerwacht, y cual placa a ser develá pa Principe Willem Alexander, cu cooperacion di Marina Real, cu a haci e momento ey, uno sumamente emotivo y importante.

Cu tin diferencia di opinion entre e Stichting Herdenking Schutterij Aruba y e comision cu a traha riba e museo, ta correcto caminda na varios ocasion a trata di envolví e fundacion aki den e plannan, pero caminda nunca esaki a ser lográ. E gesto tras di henter e proyecto aki, ta pa rindi honor na un grupo special di Arubianonan, heroenan den tur sentido di palabra, kendenan a bin ta luchando pa hopi aña, pa haña e reconocimiento pa nan envolvimento den e guerra horribel aki pa mundo henter.

Por bai den un discusion amplio y profundo riba e asunto aki, pero den un asunto asina emotivo, esaki no mester t'e caso, Marinus Wegereef asigui bisa.

Stichting Herdenking Schutterij Aruba por sigui cu su proyecto pa bin c'un monumento p'e grupo único aki, y nan tin cu sigui cu e trabao aki manera nan a bin ta haci y lo haña sostén sigur p'esaki.

Ningun momento a engañá Principe Willem Alexander y ningun momento a falsificá historia di tur loke a sosodé na Aruba durante di Dos Guerra Mundial y loke nos hendenan a haci den e tempo difícil ey.

Comision Conmemorativo 4 di Mei ta sumamente orguyoso di e esfuertonan haci, y p'e acogida y reaccion fantastico di hopi di esnan y nan famia cu a sirbi den Schutterij y Burgerwacht, cu e gesto pa bin cu e museo y un placa conmemorativo na Sabana Blanco.

Cu otronan tin otro opinion ta mas cu claro y sano, pero e diferencia aki nunca mester influencjá negativamente tur e parti positivo cu a tuma lugar siman pasá, Marinus Wegereef a terminá.